



REPUBLICA E KOSOVËS - REPUBLIKA KOSOVO
KOMUNA E VUSHTRRISE - OPSTINA VUCITRN

01 Nr. / Br 12/16

Nr. i fq. / Br. st - 3 -

Data: / Datum 28. 01. 2016

VUSHTRRI - VUCITRN



REPUBLICA E KOSOVËS

KUVENDI I KOMUNËS -VUSHTRRI

**RREGULLORE (KKV) NR.01/2016 PËR MBROJTJEN E TË MITURVE NGA
DUKURITË QË DËMTOJNË SHËNDETIN DHE ZHVILLIMIN E TYRE**

JANAR, 2016

Në bazë të dispozitave të nenit 11, nenit 12.2 pika “c” dhe nenit 17 pika “s” të Ligjit nr. 03/L-040 për Vetëqeverisjen Lokale (“Gazeta zyrtare e Republikës së Kosovës”, nr. 28/2008), të dispozitave të nenit 41.2. pika “c” të Statutit të Komunës së Vushtrrisë, nr. 58/11 të dt. 28 Prill 2011, Kuvendi Komunës së Vushtrrisë në mbledhjen e mbajtur me **28 janar 2016** miratoi:

**RREGULLOREN
PËR MBROJTJEN E TË MITURVE NGA DUKURITË QË
DËMTOJNË SHËNDETIN DHE ZHVILLIMIN E TYRE**

Neni 1

Qëllimi

Kjo Rregullore ka për qëllim të mbrojë fëmijët nga të gjitha format dhe dukuritë që dëmtojnë shëndetin, sigurinë, edukimin, arsimimin dhe zhvillimin e tyre.

Neni 2

Fushëveprimi

Me këtë rregullore përcaktohen kushtet për ndalimin e dukurive që dëmtojnë shëndetin dhe zhvillimin e të miturve. Kushtet në të cilat personat fizik, organizatat tregtare dhe shërbyese, mund t’u ofrojnë në shitje ose shërbime tjera që janë të ndaluara me ligjet e aplikueshme në Republikën e Kosovës, e që dëmtojnë shëndetin dhe zhvillimin e të miturve.

Neni 3

Përkufizimet

- 3.1 Të mitur konsiderohen personat prej moshës 14 deri në 18 vjeç.
- 3.2 Të mitur të rinj janë personat prej moshës 14 deri 16 vjeç.
- 3.3 Të mitur të rritur janë personat prej moshës 16 deri 18 vjeç.
- 3.4 Dukuri negative që dëmtojnë shëndetin dhe zhvillimin e të miturve konsiderohen: konsumimi i alkoolit, duhanit, narkotikëve të ndryshëm, shfaqjet degjeneruese, frekuentimi i të rinjve në lokalet e ndryshme në orët e vona etj.
- 3.5 Vende publike janë hapësirat, lokalet e ndryshme hoteliere shërbyese dhe tregtare, kafiteritë, internet kafet, institucionet kulturore, objektet edukativo-arsimore, kinematë dhe lokalet e natyrës së tillë.

Neni 4

Veprimet e ndaluara të objekteve afariste ndaj të miturve

- 4.1 Ndalohet rreptësisht shitja dhe përdorimi i të gjithave pijeve alkoolike dhe duhanit brenda objekteve edukativo-arsimore.
- 4.2 Të gjitha subjektet nga neni 3 paragrafi 5 të kësaj rregullore, janë të obliguara që në hyrje apo në brendi të vendosin tabelën (shenjën) për ndalimin e shitjes dhe shërbimit të pijeve alkoolike dhe duhanit për të mitur, konform dispozitave të kësaj rregulloreje.
- 4.3 Ndalohet shitja dhe shërbimi i pijeve alkoolike për të miturit nga subjektet afariste.
- 4.4 Ndalohet shitja dhe shërbimi me duhan, apo çdo lloj tjetër i duhanit të miturve nga subjektet tregtare që merren me shitjen dhe shërbimin e tyre.

4.5 Ndalohet rreptësisht që personat nën moshën 18 vjeçare të shesin pije alkoolike dhe duhan.

Neni 5

Obligimet e subjekteve të bizneseve dhe të miturit

- 5.1 Të miturit nën moshën 16 vjeçare, mund të qëndrojnë në lokalet në të cilat shërbehet alkooli vetëm në prani të prindit ose kujdestarit ligjor.
- 5.2 Të miturit e rritur mund të qëndrojnë deri në ora 20:00, ndërsa pas orës 20:00, vetëm në prani të prindit apo kujdestarit ligjor.
- 5.3 Ndalohet hyrja e të miturve në lokalet si: loto, bingo, prognoza sportive apo lojëra fati.
- 5.4 Organizatorët e shfaqjeve të ndryshme, programeve dhe manifestimeve publike dhe kulturore për të rinjtë në lokalet e mbyllura janë përgjegjës në rast se në ato lokale, lejohet përdorimi i pijeve alkoolike apo duhanit nga të miturit, në kundërshtim me dispozitat e kësaj rregulloreje.

Neni 6

Kinematë, Internet kafetë dhe Shtypi

- 6.1 Kinematë apo subjektet tjera që merren me shfaqje publike të filmave, janë të detyruara që për fëmijët deri në moshën 14 vjeçare të shfaqin ato deri në ora 16:00, prej moshës 14 deri në 16 vjeçare deri në ora 18:00, ndërsa për të miturit prej 16 deri në 18 vjeç deri në ora 20:00.
- 6.2 Pas orës 20:00 shfaqjet e tilla të miturit, mund t'i përcjellin vetëm në prani të prindit apo kujdestarit ligjor.
- 6.3 Kinematë, apo subjektet tjera janë të obliguara që me rastin e shfaqjes së filmave, përmbajtja e të cilave ndikon negativisht në formimin e të miturve në aspektin edukativ, arsimor dhe kulturor, të njoftojnë me rastin e reklamimit të filmit si dhe në hyrje të objektit ta kenë shenjën për ndalimin e hyrjes, dhe njëkohësisht janë të obliguara që mos të lejojnë hyrjen e tyre në shfaqje.
- 6.4 Internet kafetë janë të obliguara që ta ndalojnë hapjen e faqeve të cilat ndikojnë negativisht në formimin e personalitetit dhe edukimit të tyre.
- 6.5 Botuesit dhe shitësit e revistave të ndryshme, përmbajtja e të cilave është degjeneruese dhe të cilat ndikojnë negativisht në edukimin arsimor, shëndetësor dhe kulturor të të miturve, nuk mund t'ua shesin të miturve deri në moshën 18 vjeçare.
- 6.6 Video klubet apo subjektet që merren me shitjen e videokasetave, DVD-ve, CD-ve, përmbajtja e të cilave është degjeneruese, janë të obliguara që të miturve të mos u shesin dhe të mos u lejojnë përdorimin e tyre.

Neni 7

Zbatimi dhe mbikëqyrja

Drejtoria për Shëndetësi dhe Përkujdesje Sociale, Inspektorët komunal dhe policia do të kujdesen dhe të mbikëqyrin zbatimin e kësaj rregullore nga subjektet përkatëse dhe do të ndërmarrin masat dhe veprimet përkatëse sanksionuese.

Neni 8
Dispozitat ndëshkuese dhe gjobat

1. Personi juridik-subjekti afarist, nëse në lokalitetin e tij shet ose shërben pije alkoolike në kundërshtim me dispozitat nga neni 4 paragrafi 1,3,4 dhe 5 të kësaj Rregulloreje, për kundërvajtjen e kryer, do të dënohet me gjobë, njëjtë siç janë të përcaktuara në nenin 103 pika (I) të Ligjit nr. 2004/16 mbi veprimtarinë hoteliere dhe turistike, ndërsa personi fizik që shkel dispozitat e nenit 4 paragrafi 1,3,4 dhe 5 të kësaj rregulloreje, dënohet me gjobë mandatore prej (dy qind) 200.00€.
2. Me gjobë mandatore në shumë prej (pesëdhjetë) 50.00€ do të dënohen:
 - 2.1. Nëse të miturit i lejohet qëndrimi në restorant apo kafiteri etj, në kundërshtim me dispozitat e nenit 5 paragrafi 1 dhe 2 të kësaj rregulloreje;
 - 2.2. Nëse subjektet nga neni 5 paragrafi 3 veprojnë në kundërshtim me dispozitat e kësaj rregulloreje;
 - 2.3. Organizuesit e shfaqjeve, manifestimeve etj, veprojnë në kundërshtim me dispozitat nga neni 5 paragrafi 4 të kësaj rregulloreje.
3. Me gjobë mandatore në shumë prej (pesëdhjetë) 50.00€ dënohen personat përgjegjës të subjekteve nga neni 5, nëse nuk respektohen dispozitat e paragrafit 2.1 të këtij neni dhe veprojnë në kundërshtim me dispozitat e kësaj rregulloreje.

Neni 9
Dispozitat kalimtare dhe të fundit

1. Nëse subjektet nuk bëjnë pagesën e gjobave të shqiptuara në pajtim me dispozitat e nenit 8 paragrafi 2 dhe 3 të kësaj rregulloreje, në afatin prej 15 (pesëmbëdhjetë) ditësh prej ditës së shqiptimit të gjobës, do të inicohet procedura për ekzekutim në Gjykatën Themelore të Mitrovicës Dega në Vushtrri

Neni 10
Hyrja në fuqi

Kjo Rregullore hyn në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe pas publikimit në faqen zyrtare të Komunës së Vushtrrisë.


Shpëtim Zhegrova
Kryesues i Kuvendit